

02 AUG 1999

Mahathir-Tiba

DR MAHATHIR TIBA UNTUK LAWATAN KERJA DUA HARI KE PERAK

IPOH, 2 Ogos (Bernama) -- Perdana Menteri Datuk Seri Dr Mahathir Mohamad yang mengadakan lawatan kerja dua hari ke Perak tiba di sini pagi ini dengan diiringi oleh Datin Seri Dr Siti Hasmah Mohd Ali.

Ketibaan mereka di Lapangan Terbang Sultan Azlan Shah di sini disambut oleh Menteri Besar Tan Sri Ramli Ngah Talib dan isteri Puan Sri Raja Noora Ashikin Raja Abdullah serta pemimpin-pemimpin parti komponen Barisan Nasional dan ketua-ketua jabatan kerajaan.

Turut hadir Menteri Perdagangan Dalam Negeri dan Hal Ehwal Pengguna Datuk Seri Megat Junid Megat Ayob, Menteri di Jabatan Perdana Menteri Datuk Seri Tajol Rosli Ghazali, Setiausaha Parlimen Kementerian Pembangunan Koperasi Aionon Khariyah Datuk Abas dan Presiden Gerakan Datuk Seri Dr. Lim Keng Yaik.

Turut menyambut ketibaannya ialah seramai 700 orang yang membawa sepanduk dan bendera Barisan Nasional.

Dr Mahathir memulakan acara lawatannya ke Perak dengan mengadakan mesyuarat tertutup dengan pemimpin Umno dan parti komponen Barisan Nasional sepanjang hari ini.

Ia bermula dengan perjumpaan tertutup bersama 23 anggota Jawatankuasa Perhubungan Umno negeri Perak di kediaman Menteri Besar Tan Sri Ramli Ngah Talib di Jalan Tambun. Dr Mahathir kemudian akan mengadakan pertemuan tertutup dengan 1,500 pemimpin Umno bahagian, Pemuda dan Wanita Umno Perak di Dewan Bandaran, Jalan Kelab.

Dr Mahathir dan isteri akan menghadiri majlis makan tengah hari bersama pemimpin parti komponen Barisan Nasional, ketua-ketua jabatan, serta pemimpin pertubuhan dan persatuan di Dewan Bankuet, Bangunan Perak Darul Ridzuan di Jalan Panglima Bukit Gantang Wahab.

Di sebelah petang, Perdana Menteri akan meneruskan perjumpaan tertutupnya dengan 1,500 pemimpin parti komponen Barisan Nasional di Dewan Bandaran.

Sementara itu di sebelah malam beliau akan menghadiri majlis perjumpaan bersama rakyat di Stadium Perak yang akan dihadiri oleh 50,000 penduduk negeri ini untuk mendengar amanat beliau.

Esok, Perdana Menteri akan melancarkan program khas pembinaan perumahan kos rendah di Taman Bercham Jaya dekat sini sebelum berlepas pulang ke Kuala Lumpur.

-- BERNAMA.

HK zb